

Na osnovu člana 5. Stav 2. i člana 38. Zakona o budžetima u Federaciji BiH („Službene novine Federacije BiH“, broj 19/06, 76/08, 05/09, 32/09, 51/09, 9/10, 36/10 i 45/10), člana 13. Zakona o principima lokalne samouprave u Federaciji BiH („Službene novine Federacije BiH“ broj 49/06) i člana 115. Statuta Općine Hadžići („Službene novine Kantona Sarajevo“ broj 15/09), Općinsko vijeće Hadžići na 5. redovnoj sjednici održanoj dana 28.03.2013. godine donosi

**ODLUKU
O IZVRŠAVANJU BUDŽETA OPĆINE HADŽIĆI
ZA 2013. GODINU**

I- OPĆE ODREDBE

Član 1.

Ovom Odlukom utvrđuje se struktura budžeta Općine Hadžići za 2013. godinu (u daljem tekstu: budžet), način njegovog izvršavanja, upravljanje prihodima i izdacima budžeta, finansijsko izvještavanje, revizija i kontrola budžeta, ovlaštenja Općinskog načelnika, te prava i obaveze korisnika budžetskih sredstava i druga pitanja vezana za izvršavanje budžeta.

**II- STRUKTURA PRIHODA I PRIMITAKA
RASHODA I IZDATAKA**

Član 2.

Budžet Općine Hadžići je akt kojim se utvrđuje plan finansijskih aktivnosti Općine, a obuhvata projekciju godišnjih prihoda i primitaka, te utvrđenih iznosa rashoda i izdataka Općine, koje donosi Općinsko vijeće.

Budžet se donosi za fiskalnu 2013. godinu, odnosno za period od 01. januara do 31. decembra 2013. godine.

Budžet se sastoji od općeg i posebnog dijela. Opći dio budžeta se sastoji od računa prihoda i primitaka, te rashoda i izdataka. Posebni dio budžeta se sastoji od plana rashoda i izdataka raspoređenih u tekuće rashode i kapitalne izdatke za fiskalnu 2013. godinu i naredne dvije budžetske godine, sa detaljnim rasporedom izdataka po korisnicima.

Prihodi i primici priznaju se u periodu kada su mjerljivi i raspoloživi, to jest kada su uplaćeni na račun budžeta.

Rashodi i izdaci priznaju se u periodu kada je obaveza nastala.

Član 3.

Račun prihoda i rashoda budžeta se sastoji od:

PRIHODA

1. poreza koji su utvrđeni zakonom,
2. neporeznih prihoda koji su utvrđeni propisima,
3. komunalne takse i naknade utvrđene kantonalnim propisima i općinskim odlukama,
4. prihoda ostvarenih obavljanjem osnovne djelatnosti i ostalih poslova budžetskih korisnika, vlastiti prihodi,
5. primljene potpore (grantovi) od drugih nivoa vlasti,
6. namjenske donacije.

RASHODA

1. za zaposlene, kao što su tekući izdaci za plaće, naknade, izdaci za materijal i usluge,
2. tekući grantovi,
3. tekuća rezerva,
4. kapitalni rashodi i izdaci.

Višak prihoda nad rashodima iz 2012.godine čini višak prihoda nad rashodima u budžetu Općine Hadžići za 2013.godinu.

III- IZVRŠAVANJE BUDŽETA

Član 4.

Budžetom se osiguravaju sredstva za funkcionisanje Općinskih službi za upravu, Općinskog vijeća sa stručnom službom Općinskog vijeća, Općinskog pravobranilaštva, te sredstva za tekuće grantove i kapitalne izdatke. Budžet izvršava Općinski načelnik shodno važećim zakonskim propisima.

Općinski načelnik može koristiti sredstva budžeta samo za namjene koje su određene budžetom.

Budžet može primiti namjenske primitke i grantove koji se realizuju po namjeni davaoca primitka i granta neovisno od plana budžeta. Ovo se odnosi na namjenske grantove Kantona i drugih nivoa vlasti, namjenske donacije i slično.

Član 5.

Općinski načelnik je dužan u izvršavanju budžeta uskladiti dinamiku realizacije obaveza sa dinamikom priliva i odliva sredstava.

Ako se tokom godine zbog izvanrednih prilika i potreba povećaju izdaci ili smanje prihodi i primici, budžet se mora uravnotežiti sniženjem planiranih izdataka ili pronalaženjem novih prihoda.

Uravnoteženje se provodi putem izmjena i dopuna budžeta po postupku za donošenje budžeta, prema odredbama Zakona o budžetima u Federaciji BiH.

Član 6.

Općinsko vijeće razmatra tromjesečnu i devetomjesečnu informaciju, razmatra i usvaja polugodišnji i godišnji izvještaj o izvršenju budžeta, kao i Odluku o usvajanju finansijskog izvještata- završnog računa u rokovima predviđenim Zakonom o budžetima Federacije BiH.

Član 7.

Postupak nabavke roba, usluga i ustupanje radova će se obavljati u skladu sa Zakonom o javnim nabavkama Bosne i Hercegovine („Službeni glasnik Bosne i Hercegovine“, broj 49/04, 19/05, 52/05, 92/05, 8/06, 24/06, 70/06, 12/09 i 60/10), procedurama i postupcima propisanih podzakonskim aktima, kao i propisanim procedurama javnih nabavki.

Član 8.

Sredstva utvrđena u budžetu, ekonomski kod 611100- bruto plaće, isplaćivat će se u skladu sa Odlukom o utvrđivanju platnih razreda i koeficijenata za plaće nosilaca izvršnih funkcija, savjetnika, državnih službenika i namještenika u Službama za upravu Općine Hadžići, Općinskom Pravobranilaštvu i Stručnoj službi za poslove Općinskog vijeća broj: 01-01-2-1190/2013 od 31.01.2013. godine koje je usvojilo Općinsko vijeće.

Plaće i naknade troškova zaposlenih isplaćivat će se na osnovu Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj 45/10 i 111/12, te Pravilnika o plaćama, naknadama i ostvarivanju određenih prava

iz radnog odnosa državnih službenika i namještenika Općine Hadžići broj 02-14-5-2081/13 shodno raspoloživim finansijskim sredstvima.

Sredstva utvrđena u budžetu, ekonomski kod 613900- izdaci općinskim komisijama, izdaci za naknade članovima štaba CZ isplaćivat će se po Zaključku Općinskog načelnika. Sa istog ekonomskog koda isplaćivat će se naknade vijećnicima na osnovu Odluke o visinama naknada vijećnicima , članovima stalnih i povremenih radnih tijela Općinskog vijeća Hadžići na bazi mjesečnih obračuna koje sačinjava sekretar Općinskog vijeća.

Član 9.

Sredstva utvrđena u budžetu, ekonomski kod 613000 - izdaci za materijal i usluge, raspoređuje Općinski načelnik, shodno planu budžeta. Prilikom nabavke materijala, ustupanja radova i usluga procedure provoditi u skladu sa Zakonom o javnim nabavkama („Službeni glasnik Bosne i Hercegovine“, broj 49/04, 19/05, 52/05, 92/05, 8/06, 24/06, 70/06, 12/09 i 60/10).

Član 10.

Sredstva utvrđena u budžetu, ekonomski kod 614117 - grantovi mjesnim zajednicama, isplaćuju se naknade predsjednicima Savjeta mjesnih zajednica i materijalni troškovi neophodni za rad mjesnih zajednica. Sredstva planirana na ekonomskom kodu 615000 raspoređuju se za kapitalne projekte po mjesnim zajednicama. Kriterije za raspodjelu ovih sredstava odredit će Općinski načelnik putem Službe za razvoj, stambeno-komunalne poslove i mjesne zajednice u saradnji sa predsjednicima Savjeta mjesnih zajednica.“

Također, ekonomski kod 614124 – grantovi za izbore, isplaćivat će se u skladu sa potrebama i zahtjevima Općinske izborne komisije Hadžići.

Član 11.

Sredstva utvrđena u Budžetu, ekonomski kod 614200 - grantovi pojedincima isplaćivat će se na sljedeći način:

1. Pomoć penzionerima u iznosu od 10.000,00 KM. Izdvajanja će se vršiti po zahtjevu Udruženja penzionera u maksimalnom iznosu do 200,00 KM po penzioneru za sljedeće potrebe: nabavka lijekova, banjsko liječenje i sl. uz propratnu dokumentaciju, a isplata će se vršiti putem blagajne ili tekućeg računa penzionera.

2. Pomoć u liječenju i zdravstvenom osiguranju:

a) troškovi zadržavanja duševno bolesnih osoba u zdravstvenim ustanovama (Zakon o vanparničnom postupku „Službene novine Federacije BiH“, broj 2/98), 39/04 i 73/05,

b) uplata doprinosa za zdravstveno osiguranje lica koja se nalaze u statusu socijalne potrebe u skladu sa Odlukom o utvrđivanju osnovica, stopa i načinu obračunavanja i uplate doprinosa za obavezno zdravstveno osiguranje na području Kantona Sarajevo („Službene novine Kantona Sarajevo broj 29/09),

c) pojedinačne pomoći u liječenju u zemlji i inostranstvu za teško oboljela lica ,

d) ostale pomoći (nabavka paketa, interventne materijalne pomoći i sl.),

Izdvajanja pod tačkom 2c, isplaćivat će se na osnovu prijedloga Komisije, a na bazi kriterija koje je Općinski načelnik propisao, dok će se izdvajanja pod tačkom 2d odobravati pismenim nalogom (Zaključkom) Općinskog načelnika.

Član 12.

Sredstva utvrđena u Budžetu, ekonomski kod 614300- grantovi neprofitnim organizacijama, transferišu se mjesečno u visini od 1/12 plana.

Svi korisnici budžetskih sredstava dužni su polugodišnje izvještavati nadležne općinske službe po metodologiji koju će propisati te službe.

Udruženja kojima se odobravaju ta sredstva za redovan rad (sportska društva, društva iz oblasti kulture, boračka udruženja i ostali), dužna su dostaviti završni račun ovjeren od AFIP-a, održati izvještajne skupštine do kraja mjeseca marta, i dostaviti resornim službama zapisnik sa skupštine, izvještaj o radu, finansijski izvještaj, odluku o usvajanju izvještaja i program rada.

U slučaju nepoštivanja odredbi iz stava 2. i 3. Općinski načelnik zaustavlja finansiranje za tekuću godinu.

Član 13.

Sredstva utvrđena u budžetu, ekonomski kod 615000- kapitalni grantovi, koristiti za predviđene namjene i u predviđenim iznosima. Ukoliko pomenuti projekti traže veća sredstva Općinski načelnik će ponuditi Općinskom vijeću način rješavanja tog zahtjeva. Ukoliko projekti koštaju manje nego što je planom predviđeno, za ostatak sredstava Općinsko vijeće će utvrditi namjenu.

Prilikom trošenja ovih sredstava voditi računa o usklađenosti ovih izdataka sa prihodima od indirektnih poreza ekonomski kod 717100 naknade za puteve ekonomski kodovi 722531, 722532, i naknada za uređenje građevinskog zemljišta i rente ekonomski kod 722433.

Sredstva utvrđena u budžetu za nabavku i uređenje zemljišta i objekata ekonomski kod 821111, koristiti za predviđene namjene vodeći računa o dinamici prihoda-ekonomski kod grupa 811111.

Sredstva za nabavku opreme – ekonomski kod 821300 prioritete će odrediti Općinski načelnik u okviru predviđenih sredstava.

Član 14.

Sredstva ostvarena posebnom naknadom za zaštitu od prirodnih i drugih nesreća planirana su na osnovu budžetskog zahtjeva Službe civilne zaštite usklađenog sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH broj 39/03 i 22/06, kao i Odlukom o uslovima i načinu korištenja sredstava ostvarenih po osnovu posebnog poreza za zaštitu od prirodnih i drugih nesreća („Službene novine FBiH“ broj 46/05 i 61/07). Sredstva su namijenjena za opremanje struktura CZ, obuku i vježbe, provođenje preventivnih mjera zaštite od prirodnih i drugih nesreća, saniranje dijela šteta nastalih prirodnom i drugom nesrećom.

Član 15.

Hitni i nepredviđeni izdaci koji se pojave u toku budžetske godine podmiruju se iz sredstava tekuće rezerve utvrđene u budžetu.

U skladu sa članom 34. Zakona o budžetima Federacije BiH o sredstvima tekuće rezerve odlučuje Općinski načelnik i kvartalno izvještava Općinsko vijeće o korištenju planiranih sredstava.

Na osnovu člana 76. Zakona o budžetima („Službene novine Federacije Bosne i Hercegovine“, broj 19/06) svako korištenje tekuće rezerve se objavljuje u Službenim novinama Federacije Bosne i Hercegovine, odnosno u Službenim novinama Kantona, u roku od deset dana od dana donošenja Zaključka ili Odluke o korištenju sredstava tekuće budžetske rezerve.

Član 16.

Općinski načelnik u skladu sa zakonskim propisima izvršava budžet Općine.

Svaka isplata sredstava budžetskih korisnika se vrši putem računovodstva na osnovu originalnih dokumenata (Ugovori, fakture, ispostavljene situacije, zaključak i drugo) i mora biti odobrena i potpisana od strane Općinskog načelnika ili lica koje načelnik ovlasti.

Na osnovu zaključka Općinskog načelnika pogrešno ili više uplaćeni prihodi u tekućoj godini u budžetu vraćaju se uplatiocima na teret tih prihoda.

Član 17.

Nadzor nad izvršenjem budžeta vrši Ured za reviziju budžeta-proračuna u Federaciji Bosne i Hercegovine u skladu sa zakonom. Praćenje nad korištenjem budžetskih sredstava obavlja Komisija za budžet, finansije i ekonomska pitanja na način kako je utvrdilo Općinsko vijeće.

Član 18.

Za sva pitanja koja nisu regulisana ovom Odlukom primjenjuju se odredbe Zakona o budžetima-proračunima Federacije Bosne i Hercegovine.

Član 19.

Obavljanje platnog prometa po računima budžeta vrši se na osnovu zaključenih Ugovora sa ovlaštenim poslovnim bankama koje posluju na području Općine Hadžići.

Član 20.

Ova Odluka stupa na snagu danom donošenja, objavit će se u Službenim novinama Kantona Sarajevo, a primjenjivat će se za fiskalnu 2013. godinu.

Broj: 01-01-2-3033/2013.
Hadžići, 28.03.2013. godine

Predsjedavajući
Općinskog vijeća Hadžići

Proha Adnan

O b r a z l o ž e n j e

I - Pravni osnov

Pravni osnov za donošenje Odluke o izvršavanju budžeta Općine Hadžići za 2013. godinu je član 5. Stav 2 i član 38. Zakona o budžetima u Federaciji Bosne i Hercegovine („Službene novine FBiH broj 19/06, 76/08, 05/09, 32/09, 51/09, 9/10, 36/10 i 45/10), član 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj 49/06) i član 115. Statuta Općine Hadžići („Službene novine Kantona Sarajevo“, broj 15/09).

Članom 5. i 38. Zakona o budžetima u Federaciji Bosne i Hercegovine propisan je postupak i način izvršavanja budžeta Kantona, grada i općina.

II - Razlozi donošenja

Zakonska obaveza donošenja budžeta za svaku fiskalnu godinu obavezuje istovremeno donošenje i akta kojim se propisuju pravila i način izvršavanja budžeta za svaku fiskalnu godinu. U tom smislu ova Odluka se donosi u cilju utvrđivanja forme budžeta Općine Hadžići za 2013. godinu, način njegovog izvršavanja, upravljanje prihodima i izdacima budžeta, finansijsko izvještavanje, revizija i kontrola budžeta, ovlaštenja Općinskog načelnika, prava i obaveze korisnika budžetskih sredstava u izvršavanju budžeta kao i druga pitanja vezana za izvršavanje budžeta.

III - Obrazloženje predloženih rješenja

Pored općih odredbi koje su propisane članom od 1 do 3. ovom Odlukom se reguliše način izvršavanja budžeta za fiskalnu 2013. godinu.

U članu 4. i 5. Odluke utvrđen je način i dinamika korištenja budžetskih sredstava, kao i obaveza uravnoteženja budžeta putem izmjena i dopuna ukoliko se povećaju izdaci ili smanje prihodi.

U članu 6. utvrđena je obaveza podnošenja finansijskih izvještaja predviđenih Zakonom o budžetima Federacije Bosne i Hercegovine.

U članu 7. utvrđena je obaveza vršenja javnih nabavki roba, usluga i ustupanje radova u skladu sa Zakonom o javnim nabavkama, općinskim pravilnicima, te u skladu sa propisanom procedurom o javnim nabavkama.

U članu od 8.-14 utvrđen je način raspodjele i isplata izdataka po konkretnim budžetskim pozicijama, plaće i naknade zaposlenih službenika i namještenika, općinskih vijećnika i radnih tijela, isplata materijalnih troškova, tekućih grantova i kapitalnih grantova koji su predviđeni u budžetu po namjenama i korisnicima.

U članu 15. utvrđen je način korištenja i izvještavanje o korištenju tekuće budžetske rezerve.

U članu 16. utvrđena su ovlaštenja Općinskog načelnika kao i način isplate sredstava i povrat pogrešno uplaćenih sredstava.

U članu 17. utvrđena je revizija, kontrola i praćenje korištenja budžetskih sredstava.

U članu 18. propisan je način rješavanja pitanja koja nisu regulisana ovom Odlukom.

U članu 19. utvrđen je način realizacije, odnosno platni promet.

U članu 20. utvrđen je način objavljivanja Odluke o izvršavanju budžeta za 2013. godinu.